

տիճան զինուորականի պաշտօնը, միակե-  
ցական ու եկեղեցական վիճակի նուիրած  
էր ինքզինքը, և իբր պայծառ լուսաւոր  
մը փայլեցաւ հայ երկնքին վրայ: Սոյն  
երկուքն եղան, որ միացած Վառձապու-  
հի հետ, մեր Ոսկեղարի հիմը դրին՝ հայ  
տառերուն գիւտով, որ թէ և յատկապէս  
Ս. Մեսրոբի մեծագոյն արդիւնքն է, բայց  
Ս. Սահակ՝ անոր գլխաւոր սատարողն և  
աջակիցը, և Վառձապուհ՝ դժուարութեանց  
հարթողն եղաւ: Այդ ատենն է, որ կա-  
տարուեցաւ Ս. Գրքի առաջին թարգմա-  
նութիւնը ասորի Փեշխտայի վրայէն, որ  
յետոյ Եօթանասնից լաւագոյն օրինակի մը  
հետ համեմատուելով ճշդուեցաւ և կատա-  
րելագործուեցաւ և առաջ եկաւ այն ան-  
նման հրաշակերտը, որ ամենուն հիացումը  
կը գրաւէ: Այդ շրջանին է դարձեալ, որ  
Ս. Սահակ բարեկարգեց հայ կղերին նուի-  
րապետութիւնը, բարձրացուց անոր բա-  
րոյական և գրական մակարդակը, ճոխա-  
ցուց մեր եկեղեցական պաշտամունքը,  
ժամերգութիւնները, ծէսերը և արարողու-  
թիւնները իր սխրալի ու երկնաթռիչ ա-  
ղօթքներով, շարականներով ու երգերով:  
Ափսո՛ս, սակայն, որ երկար չտեւեց այդ  
երջանիկ շրջանը. տժգունեցաւ, ամպոտե-  
ցաւ դարձեալ Հայաստանի քաղաքական  
վիճակը. Վառձապուհի մահուամբ, իրեն  
արժանաւոր յաջորդ ու ժառանգ մը թո-  
ղած չըլլալով: Անոր միակ որդին, Ար-  
տաշէս Դ, տակաւին անխելահաս ու ան-  
չափահաս մանուկ մը, անկարող արքունի  
զահին վրայ բարձրանալու, սպասեց 7-8  
տարի, մինչև որ Ս. Սահակ՝ պատգա-  
մաւորութիւն մը զրկելով պարսիկ Վառձ  
Ե թագաւորին արքունիքը՝ յաջողեցաւ  
հաշտութիւն և խաղաղութիւն կնքել, և  
արշակունի գահին վրայ բարձրացնել զին-  
քը: Սակայն հայ երիտասարդ թագաւորին  
մեղկ և անբարոյ ընթացքը, որ շատ հե-  
ռու էր իր հօրը լուրջ և անստգիւտ վար-  
քէն, այնչափ զուեցուց և զայրացուց հայ  
նախարարները, որ քամահելով Ս. Սա-  
հակի հայրական յորդորները, և աւելի  
իրենց փառասիրական ձկտումներէն մըղ-

ուած՝ քան թէ հայրենիքին օգտակար  
ըլլալու նպատակէն՝ պարսիկ արքային  
ձեռքը մատնեցին իրենց թագաւորը,  
չխղճելով ամբաստանել նոյն իսկ իրենց  
վեհափառ և պատկառելի հովուապետը,  
իբր յունասէր մը և պաշտպան իրենց ան-  
կարգ և դաւաճան թագաւորին: Վառձ  
Ե արքունիք կանչելով երկուքն ալ, Սրտա-  
շէս թագաւորը և Ս. Սահակ կաթողիկոսը,  
գահընկէց ըրաւ զիրենք, և այսպէս վեր-  
ջացաւ արշակունի պանծալի հարստու-  
թիւնը, որ իբր 376 տարիներու շրջանին՝  
փառահեղ և մեծամեծ թագաւորներու և  
ղեցազնական արարքներու հանդիսավայր  
մ'ըրած էր Հայաստանը: Ս. Սահակ ալ,  
որուն միակ յանցանքն էր՝ իր չափազանց  
հայրենասիրութիւնը և իր աստիճանին  
վայել նախանձը Աստուծոյ փառաց և Եկե-  
ղեցոյ իրաւունքներուն, զրկուեցաւ հայ-  
րապետական թիոռէն, և տեղը դրուեցաւ  
Արծկեցի Սուրմակ անունով սեւերես երէց  
մը, ի վարձ իր պժգալի մատնութեան, որ  
քիչ վերջը վտարուեցաւ նոյն իսկ իրեն  
կուսակից նախարարներէն իր լկտի վար-  
քին և յեղյեղուկ նկարագրին պատճառով:  
Իրմէ վերջը զրկուեցան Տիգրանէն իբր  
կաթողիկոս Հայոց՝ երկու լպիրշ ասորի-  
ներ, Բրքիշոյ և Շմուէլ, որոնք եկան լե-  
ցուցին իրենց տանտիկիւններով Հայոց  
հայրապետանոցը, զոր Ս. Սահակ զար-  
դարեր՝ ճոխացուցեր էր սուրբ և իմաս-  
տուն եպիսկոպոսներով, վարդապետներով  
և խորագնազգեաց ճգնաւորներով: Այդ  
երկու անարժան ասորիներն ալ՝ շատ չան-  
ցած՝ անհետացան, ծաղր ու ծանակ ըլլա-  
լով իրենք ալ և զիրենք զրկողներն ալ:  
Հոս բնական կու գայ խորհրդածել թէ՛  
պարսիկ արքային այդ երկու ասորիները  
Հայոց կաթողիկոս կամ կրօնապետ նշա-  
նակելուն մէջ՝ Սելեւկոյ կամ Տիգրանի  
ասորի պատրիարքին մատը չկա՞ր միթէ.  
նկատելով մանաւանդ որ՝ հայ թագաւո-  
րութեան բարձումով՝ Հայաստանը սոսկ  
նահանգ մը դարձեր էր պարսիկ պետու-  
թեան, և ասորի պատրիարքը՝ որուն ա-  
թուր Տիգրանի մէջ կամ մօտ կը գտնուէր՝